

No Keda Atras!

Nos no sa presis ki dia e lo sosodé. Nos no sa presis kon e lo sosodé. Ma nos sa sigur ku un dia e lo sosodé! Un dia miles--nò, miones--di hende lo desparesé den un será di wowo.

Nos por imaginá so ki impakto e evento aki lo tin. Outonan riba karetera sin shoufùr lo aksidentá. Avion lo kai pa e mésun motibu. Talbes ora amanan di kas a kaba yena nan garoshi ku komestibel na pakus i ta kla pa paga, nan no por haña kahera. Den kantornan, lus ta sendé, èrko ta traha, un kòpi di kòfi kayente ta riba lèsenar, buki ta habrí, kompùiter ta traha, ma ningun hende t'ei. Na sitio di konstrukshon, betòn moler ta drai ketu bai, sin ningun hende pa atend'é. Of span, trapi, i martin ta kai; ma ora ta buska e trahadó heridá drumí na suela, e no t'ei. Kasnan ta kima, pasobra kandela di stof a keda sendé bou di weanan ora e ama di kas a desparesé. Kisas den un wega di futbol, defensa ta pasa bala pa un delantero. Ma diripiente e delantero no t'ei mas, ni tampoko tres otro hungadó di su tim. Na hòspital, enfermera ta bin chèk kon a sigui ku un pashènt paralisá, i ta haña su kama bashí.

Esaki ta esenan di un pelikula nobo di horor? Nò! E ta un realidat ku lo sosodé un dia! Tampoko e no ta un eksagerashon! Nos no sa e detayenan. Ma Beibel ta konta nos bon kla di e evento aki ku lo sosodé!

Promé ku Hesus a muri, resusitá, i bai shelu, El a bisa Su disipelnan, "Na kas di Mi Tata tin hopi lugá, si no tabata asina lo Mi a bisa boso; pasobra Mi ta bai pa prepará lugá pa boso. I despues ku Mi a bai i a prepará lugá pa boso *Mi ta bini atrobe i lo mi tuma boso serka Mi*, pa boso tambe por ta unda Mi (Juan 14:1-3). Si Hesus no ta kumpli ku Su promesa aki, E ta un gañadó, i pues un pekadó méskos ku tur hende.

Otro teksto tambe ta deskribí e evento troumátiko aki. "Ata mi ta bisa boso un misterio: nos tur lo no muri; ma nos tur lo ta transformá si, den un instante, den un será di wowo, ku e último sonido di trompèt; pasobra e trompèt lo ta toká i e mortonan lo wòrdu lamtá pa no kaba nunca mas, i nos lo ta transformá" (1 Korintionan 15:51-52). "Señor mes lo baha fo'i shelu ku gritu i ku bos di arkangel i ku tròmpe di Dios, i esnan ku a muri den Kristo lo lamta promé; despues *nos ku a keda na bida lo wòrdu hibá ariba den nubianan pa kont e Señor den laira*; i asina nos lo ta sèmper ku Señor" (1 Tesalonisensenan 4:16-17).

Bolbe lesa e tekstonan aki di Skritura santu. Ripará bon kiku nan ta bisa. 1) Hesus mes lo baha fo'i shelu, ma E lo keda den laira so. 2) Algun defunto lo resusitá i ser transformá físikalmente. Ningun pèrsona por yega shelu sin un kambio físico. 3) Tambe algun hende ku ta na bida lo realisá e transformashon físico aki den un será di wowo i lo kontrá Hesus den laira. 4) For di e momentu ei, e hendenan aki lo ta sèmper ku Señor den kurpanan transformá ku no ta kaba.

Esei ta loke Palabra di Dios ta bisa! Esaki no ta un pelikula spantoso ku bo por paga i bisa "esei nunca por sosodé." Bo por ignorá e palabranan aki di Beibel. Pero tòg nan ta keda bèrdat. Bo por purba lubidá nan. Ma esei no ta skrap e palabranan aki for di Beibel. Echu ta ku E EVENTO AKI LO SOSODE!

E úniko pregunta ku ta keda ta si abo lo ta un di esnan ku por bai huntu ku Kristu, òf si bo lo mester keda sufri e rabia di Dios ku E ta basha riba esnan ku a keda atras despues di e evento aki.

Segun e tekstonan aki i otro Skritura por nota ku tin un manera so ku bo por prepará pa e evento aki. Esei ta dor di atmití na Dios ku bo ta un pekadador ku bo ta meresé Dios Su kastigu pa bo piká, i ku bo no por hasi nada pa skapa di Su kastigu. Realisá ku Kristu a muri riba krus pa tuma e kastigu ku bo ta meresé pa bo piká. Bandoná piká, konfia Kristu i pid'E pa skapábo di piká i su kastigu.

Si bo ta hasi e desishon konsiente aki sinseramente, bo tambe por ta kla pa e dia ku Kristu lo bin. Ma si bo no hasi e desishon aki, sigur sigur lo bo ta un di esnan ku ta keda atras. Bo ta kla pa e dia ei?